




Non



Dad



Sam



Mam



Jac

# Darllen a Deall gyda Sam

Mae'r gyfres hon yn dysgu plant i ddarllen, deall ac ymateb i'r hyn y maent wedi ei ddarllen.

Yn y gyfres mae pymtheg o storïau bywiog, ysgafn a dymunol sy'n dilyn hynt a helynt cymeriad o'r enw Sam, ei deulu, ei ffrind Non a Jac ei gi bach.

Mae pum copi o bob llyfr yn y pecyn er mwyn sicrhau bod y plant yn cael cyfle i ddarllen gyda'i gilydd, ar goedd, ar y cyd ac mewn grŵp dan arweiniad athro/athrawes neu gymhorthydd. Mae'r storïau wedi eu rhannu yn dair rhan er mwyn galluogi'r plant i ganolbwyntio ar y manylion sydd yn y testun, ac ymateb i'r hyn a ddarllenwyd yn bwyllog trwy ateb cyfres o gwestiynau syml o fewn sesiwn ddarllen ddyddiol.

Mae adnoddau ychwanegol i atgyfnerthu'r dysgu y tu mewn i'r pecyn hwn. Hefyd, gallwch lawrlwytho adnoddau sy'n cyd-fynd a'r gyfres oddi ar ein gwefan:

[www.dysgugydasam.co.uk](http://www.dysgugydasam.co.uk)

## Nodweddion y gyfres

- Ar ddechrau pob stori mae adran sy'n rhoi cyfle i'r plant ymarfer strategaethau darllen sy'n cynnwys cyfle i ddysgu darllen geiriau hir ac anodd, hynny yw, sillafoli, a deall ystyr geiriau cyn iddynt ddod ar eu traws yn y testun.
- Cyfle i ddysgu synau llythrennau a gweld cyfuniadau mewn geiriau ac i ddatgodi geiriau.
- Cyfle i ddeall nodweddion stori syml.
- Cyfle i ddysgu sut i godi gwybodaeth sy'n gysylltiedig â'r testun ac i ateb cwestiynau syml trwy ddewis yr ateb cywir o nifer o ddewisiadau.
- Cyfle i ddod o hyd i'r rhannau pwysig sy'n dangos am beth mae'r testun yn sôn.
- Cyfle i adalw a dwyn i gof fanylion o'r testun ac ail ddarllen a darllen ymlaen.

Ar ddiwedd pob stori mae adran fechan sy'n rhoi cyfle i'r plant drafod a meithrin eu sgiliau llafar trwy ymarfer defnyddio patrymau brawddegol syml sy'n cysylltu eu profiadau personol â'r digwyddiadau yn y storïau.

**Mae agweddau hanfodol o ddysgu darllen yn unol â gofynion y Fframwaith Llythrennedd Cenedlaethol yn sylfaen i'r gyfres hon.**

# Pethau pwysig i'w cofio

- Adnodd ar gyfer dysgu grwpiau o blant yn bennaf yw'r pecyn hwn. Gellir ei ddefnyddio gydag unigolion os oes ganddynt angen cymorth dwysach na'r arfer.
- Mae'n hanfodol bod oedolyn yn arwain y gweithgareddau darllen.
- Mae angen i'r sawl sy'n arwain ennyn brwdfrydedd y plant tuag at ddarllen a chynnal eu diddordeb wrth iddynt ddysgu sut i godi gwybodaeth o destun a'i ddehongli.

## Sut i fynd ati

### Cam 1

Dewiswch stori addas o'r gyfres ar gyfer y plant. Mae'r storïau wedi eu graddio'n ofalus yn ôl y nifer a'r math o eiriau sydd ynddynt. Dechreuwch trwy drafod y stori gyda'r plant. Tynnwch sylw at y teitl, y lluniau a'r cymeriadau. Gadewch i'r plant ragfynegi a dyfalu beth sy'n mynd i ddigwydd yn y stori ac anogwch hwy i chwilio am gliwiau. Yna darllenwch y stori gyfan iddynt er mwyn modelu'r dull o'i darllen yn gywir.

### Cam 2

Ewch at y rhestr o eiriau anghyfarwydd sydd yn y testun ar ddechrau'r llyfr. Dangoswch i'r plant sut i ddefnyddio'r strategaethau ffonig posibl i ddarllen y geiriau. Rhowch gyfle iddynt ymarfer eu datgodio. Sicrhewch fod y plant yn cael cyfle i hunan gywiro ac i ail-ddarllen hyd nes y byddant yn gallu darllen yn hyderus. Hefyd manteisiwch ar y cyfle i sicrhau bod y plant yn gwybod ystyr geiriau. Mae hwn yn gyfle da i esbonio ystyr geiriau anghyfarwydd.

### Cam 3

Mae tair rhan i bob stori. Gadewch i'r plant ddarllen y stori gan ganolbwyntio ar un rhan ar y tro. Cynigiwch arweiniad a chymorth os oes angen. Chi fel oedolyn fydd yn arwain y plant drwy'r cwestiynau ar ddiwedd y darn. Anogwch y plant i chwilio am yr atebion yn y testun. Cwestiynau i'w hateb ar lafar yw'r rhain i gyd. Os ydych yn dymuno i'r plant gofnodi eu hatebion a gweithio yn annibynnol mae'n bosibl defnyddio taflenni arbennig sydd yn y pecyn.

### Cam 4

Cymerwch y cyfle i drafod testun y stori yn fwy cyffredinol. Rhowch gyfle i'r plant fynegi barn ynglŷn â'r digwyddiadau. Ceisiwch annog y plant i uniaethu gyda'r cymeriadau ac i gysylltu cynnwys y stori â'u profiadau personol. Gofynnwch i'r plant lunio brawddegau eu hunain trwy efelychu'r patrymau sydd wedi eu hawgrymu o dan y pennawd 'trafod testun'. Mae hwn yn gyfle i loywi iaith.

### Cam 5

Os ydych yn dymuno i'r plant ymateb i'r storïau ymhellach trwy gofnodi ar bapur, defnyddiwch y taflenni gwaith sydd yn y pecyn. Mae nifer o dasgau ysgrifennu, arlunio a lliwio wedi eu paratoi ar eich cyfer.



# Darllen geiriau hir ac anghyfarwydd

Gall darllen geiriau newydd, hir, anghyfarwydd sy'n cynnwys nifer o sillafiadau fod yn anodd. Er hynny, mae'n bosib ei gwneud hi'n haws i'w darllen trwy eu rhannu yn ddarnau bach, byr.

## Darllen geiriau unsill

Rhowch amser i egluro sut mae datgodio geiriau yn gweithio trwy eu rhannu fesul sŵn/sain y llythrennau unigol, cyn eu cyfuno i greu geiriau.


Dangoswch sut i wneud hyn trwy swnio pob llythyren mewn gair ar y tro, ac yna ynganwch/darllenwch y gair i gyd.

**b-a-t** = bat      **c-a-r** = car

## Darllen geiriau dau/thrisill

Dechreuwch trwy egluro i'r plant beth yw sill. Dangoswch sut i rannu geiriau deusill a thrisill ac yn y blaen, drwy roi llinell rhwng y sillafiadau neu drwy guddio rhannau o'r gair â'ch bysedd.

teganau      afalau  
**teg-an-au**      **af-al-au**



## Awgrymiadau

Os yw plentyn yn ceisio darllen gair anghyfarwydd unsill defnyddiwch eich bys i bwyntio at y llythyren sydd angen ei darllen. Bydd hyn yn helpu'r plentyn i dorri'r gair i synau unigol ac yn ei alluogi i'w ddarllen a'i ynganu'n gywir.

Gyda geiriau hir anogwch y plentyn i ddilyn rhythm a churiad wrth ymarfer. Mae'n bosib i'r plentyn gyfri sawl gwaith y mae'r geg yn agor wrth iddo ynganu'r gair; bydd yn cyfateb i'r nifer o sillafiadau yn y gair.

Defnyddiwch y cardiau fflach sydd yn y pecyn. Mae'r rhain wedi eu paratoi er mwyn eich galluogi i roi'r geiriau cyfan a'r geiriau a llinellau rhwng y sillafiadau cefn wrth gefn.

## Gêm 1

Gosodwch y cardiau fflach sydd yn y pecyn ar y bwrdd a gofynnwch i'r plant eu dosbarthu yn ôl sawl sill sydd yn y geiriau. Penderfynwch pa ochor i'r cerdyn sy'n addas h.y. y gair cyfan neu'r gair wedi ei rannu.

## Gêm 2

Gofynnwch i'r plant ysgrifennu rhestrau o eiriau unsill, deusill a thrisill o fewn cyfyngiad amser.

## Gêm 3

Argraffwch dwy set o gardiau a chwaraewch gêm 'snap' gan ddarllen y geiriau os ceir pâr ohonynt yn ymddangos gyda'i gilydd.

# Cyfuno llythrennau

Pan mae dwy lafariad neu ddwy gytsain yn ymddangos mewn trefn o fewn gair gellir eu cyfuno i greu un sŵn llyfn, cyfunol.

## Er enghraifft

'tr' yn y gair 'tr-ê-n'  
yn hytrach na 't-r-ê-n'

'aw' yn y gair 'm-aw-r'  
yn hytrach na 'm-a-w-r'

O weld y cyfuniadau cyffredin hyn o lythrennau yn aml fe ddaw'r plentyn i'w darllen yn rhwydd gyda'i gilydd. Gweler isod esiamplau o gyfuniadau sy'n ymddangos yn aml o fewn geiriau.

## Cytseiniaid clwm

bl, br, chw, cl, cr, dr, ffl, ffr, gl,  
gr, nt, pl, pr, sg, sm, st, tr

## Llafariaid clwm

ae, ai, au, aw, ei, oe, wy, ew,  
eu, ia, ie, io, ow, iw, yw, wa,  
wi, wy



## Awgrymiadau

Dangoswch a darllenwch y rhestrau o eiriau sydd â chyfuniadau o lythrennau ynddynt ar ddechrau'r llyfr.

Chwiliwch am y geiriau hyn yn y stori. Gall y plant ysgrifennu rhestr ohonynt os ydych yn dymuno.

Defnyddiwch y cardiau fflach sydd yn y pecyn i chwarae gemau syml er mwyn ymarfer darllen y geiriau a dysgu eu hadalw yn gyflym.

## Gêm 1

Rhoi'r cardiau â geiriau arnynt a'u pennau i lawr ar y bwrdd. Troi'r cardiau trosodd fesul dau er mwyn casglu paru o eiriau sydd â'r un math o gyfuniadau o lythrennau arnynt. Y plentyn sydd â'r mwyaf o barau sy'n ennill.

## Gêm 2

Pan mae'r cyfuniad o lythrennau yn digwydd ar ddechrau gair gellir ceisio creu brawddegau sy'n cynnwys cyflythreniadau ynddynt a rhieni'n rhai doniol os yn bosibl! e.e. Rhaid **trio** chwythu **trwyn** y **trên** **trwm**.

## Gêm 3

Gadewch i'r plant sylu ar restr o eiriau am funud neu ddau (defnyddiwch amserydd, os yn bosibl) er mwyn ceisio eu cofio i gyd. Yna cuddiwch y geiriau a rhowch gyfle i'r plant eu dwyn i gof. Fe allwch chi neu'r plant ysgrifennu'r rhestr.